



UNIVERSITÄTS-
BIBLIOTHEK
PADERBORN

**Ethica Symbolica E Fabularum Umbris In Veritatis Lucem
Varia Ervditione Noviter evoluta**

Pexenfelder, Michael

Monachii, 1675

V. Danaidum dolium.

[urn:nbn:de:hbz:466:1-68709](https://nbn-resolving.org/urn:nbn:de:hbz:466:1-68709)

Danaidum Dolium. Ex Virgil. & Ovid.

Ethicè.

1. Beneficia ingratis collata. 2. Iniqua iussa. 3. Avaritia inexplebilis. 4. Mulier scorpioni similis, quæ.

Danaus erat Rex Argivorum, *Beli* filius hic genuit filias quinquaginta, quæ ab avi nomine *Belides*, à patris autem, *Danaides* dictæ sunt. Horum igitur parens Danaus cum similitudinem, quæ ipsi cum fratre *Egypto* intercedebat, cuperet componere, satis aptam eius negotii conficiendi opportunitatem fore existimavit, si filias suas omnes daret in matrimonium totidem fratris sui filijs. Facile convenitur: celebrantur nuptiæ, sed infastæ, Nam Danaus, vel quia memor acceptæ olim à fratre injuriæ (in Græciam ab eo pulsus profugerat) vel quia ex oraculo didicerat, ab uno generorum sibi mortem imminere, clam singulis filiarum dedit pugionem, monuitque, ut prima nuptiarum nocte, dormientes sponfos adortæ, jugularent. Dictum, factum. Quadraginta novem juvenes interficiuntur singuli à singulis uxoribus, solâ *Hypermnestâ*, filiarum maximâ, marito, cui nomen *Lyncæus*, parcente; is qui deinde Danao expulso apud Argos regnavit. Ob scelus tam impium, tam immane, apud inferos eo supplicii genere perpetuò damnatæ sunt, ut aquam vase perforato haurire cogantur è puteo, vel, quod idem est, implere dolium rimosum, è quo tantundem semper effluat, quantum infunditur.

Ethica.

Multiplex hinc doctrina. Primò Dolium Danaidum perfluens indicat, beneficia in ingratos non conferenda. Effluit è memoria, è grata mentis recordatione, & agnitione gratiæ, quidquid infundas. 2. Parentes in iis, quæ adversus Deum sunt, non esse audiendos. Impietas hîc est, pium esse. *Belides* magis attendere debebant, quid pacta, quid jura conjugalia & fides data, ac natura ipsa postularet, quàm quid odia genitoris, tantò constantia, exigerent. 3. Avaris aut prodigis nihil esse satis. Inexplebilis est auri sitis; si *Pactolum*, *Tagum*, Hebrum auriflua bibat flumina, nunquam dicet: *sufficit!* Et qui semel sua per luxum profundere

(d) Beneficia ingrati collata.

fundere cœpit, quidquid hauserit, exhauriet. 4. Garrulis accommodatur, qui ut est apud Comicum: *pleni rimarum, hac, illacque disfluunt.* 5. Denotatur perfidia muliebris. Verè Menander

Πολλῶν κατὰ γῆν, καὶ θαλάσσιον θογῶν
ὄντων, μέγιστον ἐστὶ θνητῶν γυνή.

Tot cùm mari, terraque sint passim feræ,

Fera omnium ipsa maxima extat femina.

Ecclesiasticus monet. c. 26. *Qui tenet mulierem nequam, quasi qui apprehendit scorpionem.* Primò, quia solus inter insecta scorpium longo spiculo armatur, & brachia quinque bisulcis dentata forcipibus habet, ait Aristoteles lib. 4. de historia animal. c. 7. Ita mulier nequam, virulenta linguæ spiculo armatur, brachiaque habet dentata, quibus maritum apprehendat, lacessat, vexet. 2. Scorpium pestilentissimum est & exitialis. Mulier nequam assiduè virum cruciat, & lenta morte conficit. 3. Scorpium ictu ferit obliquo & inflexo: Mulier dum blanditur, venenat. Josephus lib. 5. Antiq. c. 17. scribit, Samsonem, cùm suum ænigma de leone & ape Philistæis à Dalila proditum cognovisset, exclamasse: *Nihil est dolosius feminâ.* Et Poëta:

Sidera non tot habet cælum, non flumina pisces,

Quot scelerata gerit femina mente dolos.

Et alius:

Ah crudele genus, nec fidum femina nomen!

Franciscus Petrarca dial. 65. conqueritur: Nempe etiam illustrium multi, dolo conjugum periere. Silco Danaï truces & cruentas nuptias & infamem noctem, miseramque tot juvenum stragem. Confirmant hoc exempla, ex plurimis pauca adferam. Redeuntem ab expeditione Trojana Agamemnonem Clytemnestra uxor interfecit. Ninum Semiramis comprehendi, & interim iussit. Alexandrum Pheræum Thessaliæ Regem, Thebe uxor dormientem jugulavit. Antiochum Syriæ Regem Laodice veneno sustulit. Antoninum Verum Imp. Lucilla eodem mortis genere peremit. Idem Agrippina fecit, Tiberium Claudium, Principem è medio tollendo. In ipsis castris Alexandri Spitamenem quendam barbarorum ducem, somno & vino sepultum conjux è vita exturbavit. Propius ad Danaïdas accedit, quod Volaterranus refert, Albinam quandam Syriæ Regis filiam duas & triginta habuisse sorores, quæ totidem maritos interfecerunt: expulsasque propterea à patre, venisse in Britanniam, & nomine Albinæ insulam vocasse Albionem. I nunc, & securitatem tibi

SYM-